

11 MAY 1999

Hassan-pita

UMNO SELANGOR BELUM TERIMA PITA BUKTI FITNAH

SHAH ALAM, 11 Mei (Bernama) -- Badan Perhubungan Umno Selangor belum menerima sebarang bukti berbentuk pita rakaman berhubung ucapan pihak tertentu yang mengandungi tuduhan liar atau fitnah terhadap kepemimpinan Umno atau kerajaan.

Menteri Besar, merangkap pengerusi badan perhubungan itu, Datuk Seri Abu Hassan Omar berkata Biro Penerangan dan Biro Perancangan Strategik telah mengedarkan 1,421 kaset dan pita rakaman video kepada beberapa cawangan di Selangor sejak awal bulan lepas dalam usaha membantu Panel Peguam Umno mengumpulkan bukti dan mengambil tindakan terhadap mereka yang terbabit.

Beliau bagaimanapun berkata perkembangan sekarang menunjukkan bahawa langkah yang diambil oleh Badan Perhubungan telah berjaya membentasi kegiatan penaburan fitnah itu dari berleluasa.

"Gerakan mencari bukti masih diteruskan, tetapi sekarang jarang sekali kedengaran lagi tuduhan-tuduhan liar terhadap kepimpinan kerajaan, mungkin mereka sudah takut," katanya kepada pemberita semasa merasmikan majlis sambutan Ulangtahun Umno ke-53 di perkarangan bangunan Umno Selangor di sini hari ini.

Beliau berkata Umno telah menubuhkan Jawatankuasa Menangani Fitnah dan Panel Peguam Majlis Tertinggi Umno dipengerusikan Timbalan Menteri di Jabatan Perdana Menteri, Datuk Ibrahim Ali untuk mengambil tindakan ke atas mereka yang terbabit menyebarkan tuduhan liar atau menabur fitnah membabitkan pemimpin dan kerajaan.

Sementara itu, Abu Hassan berkata 300 motosikal akan mengiringi kenderaan Perdana Menteri, Datuk Seri Dr Mahathir Mohamad bermula dari bulatan berhampiran Stadium Shah Alam sehingga ke bangunan Umno di sini sebagai menyambut kehadiran Perdana Menteri untuk merasmikan bangunan itu pada hari Khamis ini.

Beliau berkata semua pembonceng motosikal itu akan membawa bendera Umno dan bergerak secara perlahan sehingga tiba di perkarangan bangunan Umno di mana kira-kira 5,000 lagi jemputan menunggu kehadiran Perdana Menteri.

Menurutnya bagi tujuan sambutan itu, beberapa jalanraya sekitar Shah Alam yang menghala ke bangunan Umno Selangor akan ditutup kepada kenderaan selama kira-kira tiga jam.

Beliau berkata antara jalan yang akan ditutup adalah Persiaran Perbandaran serta Persiaran Perdagangan dan orangramai yang ingin turut serta menyambut kehadiran Perdana Menteri diminta datang awal untuk mengelakkan kesukaran mendapatkan tempat.

-- BERNAMA

AZH zb